

Nganong Angayan Supakon ang Tagalog

by **Manuel Faelnar**

<http://groups.yahoo.com/neo/groups/bisaya/conversations/messages/21781>

Kay ang Tinagalog pinugos man. Ang mga pulong nga Kinatsila, Iningles, Arabo, Hindi, Sanskrit, Javanese nga nasulod sa atoang pinulongan pinaagi man sa osmosis. Wala may namugos. Gawas niana, daghan pod ang teknikal nga wala sa atoa ug gihulaman gikan sa Iningles ug Kinatsila.

Kini bayang pinugos nga pinulongan makabuak og nasod. Nabuak ang Pakistan tungod namugos ang mga ultranationalist didto nga Urdu ra ang pinulongan. Wala manugot ang Bengali ug natawo ang Bangladesh.

Ang pinugos nga pinulongan maoy hinungdan sa civil war sa Sri Lanka. Namugos ang Sinhalese nga Sinhala ra ang pinulongan. Wala manugot ang Tamil busa gagubat. Napilde tuod sa gubat ang Tamil pagkahuman sa 25 ka tuig apan ningdaog sila sa pinulongan kay karon giila sa Constitution sa Sri Lanka nga co-national languages ang Sinhala ug Tamil. Matod pod sa Constitution sa Sri Lanka, alang sa komunikasyon sa duha ka katilingban, Iningles ang gamiton.

Hapit mabuak ang Belhika ug Espanya tungod lang sa pinulongan. Karon giila na sa Espanya nga opisyal nga pinulongan ang mga sinultian sa matag "comunidad autonoma", ug sa Belhika giila nga opisyal nga pinulongan ang Pranses, Flemish ug Inaleman.

Hapit pod mabuak ang Canada tungod sa pinulongan. Opisyal ang Prances sa Quebec ug opisyal ang Inuit sa Teritoryo sa Nanuvut.

Ang India walay nasudnong pinulongan. Matag Estado adunay pinulongan nga opisyal. Ang South Africa walay nasodnong pinulongan. Adunay mga 10 ka opisyal nga pinulongan. Ang lingua franca sa matag katilingban Iningles.